

四庫全書

集部

欽定四庫全書

御訂全金詩增補中州集卷二十三

張郟城公樂

三首

公樂字元石宰相安簡公孝純永錫之孫以父
蔭入仕嘗為郟城令詩號竹堂集寒食云一百
五日寒食節二十四番花信風新年云客情病
裏度殘臘老色鏡中添一年雲樹縈寒猶漠漠
竹梢迎日已娟娟春晚云細風皺綠漲溪水小

雨點紅添海棠又云芭蕉葉斜卷舒雨醱醱架
小縱橫春人喜傳之子觀字彥國仕為某軍節
度副使孫厚之字茂弘承安五年進士

許下三庚劇暑盛於他州懷思故鄉嶧山山水真
清涼境界也感而作詩

魯東百里近福地曰鳧繹千峯開玲瓏絕澗瀉湍激岱
宗古獨尊象緯了不隔

嶧山至泰山不遠

此山許攀聯朝著有

班秩虛巖互霞蔚秀石森玉立泉聲動環珮林樂盡等

瑟

林樂出
莊子

樹老潤饒菌果熟香隕實激風松落花汎雪

崖溜蜜木敷虎磨癢沙迴鳥伸翮

水禽嬉戲引吭
伸翮劉禹錫集

竹葉

若來往桃源當甲乙曾經晉人隱

晉郝鑒因避亂挈充
人來嶧山事見本傳

喜脫塵網密事往不記年人說猶前日我來官許下濁

暑病逾劇慢膚便枕簟白汗沾巾幘屢輟五夜眠輒廢

中盤食炎官令方虐著意不憐客語此作惆悵可以知

得失遙知舊經行雲起水邊石平生二三子相對坐橫

策今世葛天民何容挽之出

往鄜州

出門旋復入崎嶇
行路真將蜀道如
婦凍村童燒積葉
趣春田婦鬻新蔬
雪花被岸中流黑
雲氣涵山衆壑虛
老子頻年厭羊酪
故溪新綠正肥魚

二月

二月芳事何等好
南陌東城饒物華
春風無意管楊柳
晴日有心烘杏花
故山隨分可娛老
宦游到處聊為家
夢歸草堂捲疎箔
幾點白鷗眠淺沙

任南麓詢

九首

詢字君謨易州軍市人父貴有才幹善畫喜談
兵宣政間游江浙君謨生於處州為人慷慨多
大節書法為當時第一畫亦入妙品評者謂畫
高於書書高於詩詩高於文然王內翰子端獨
以其才具許之君謨正隆二年進士歷省掾大
名總幕益都都司判官北京鹽使課殿降秦州
節廳時無藉力者故連蹇不進六十四致仕優

游鄉里家所藏法書名畫數百軸日夕展玩不
知老之將至年七十卒平生詩數千首君謨歿
後皆散失今所錄皆得於傳聞之間如山居云
種竹六七箇結茅三四間稍通溪上路不礙屋
頭山黃葉水清淺白雲風往還戊申春晚云水
邊團月翻歌扇風裏垂楊學舞腰南郊小隱云
林邊鳥語月微下竹裏花飛春又深前輩喜稱

道云

嶺柳今何在蘇黃世已無
皇天開老眼特地降君謨

附趙秉文題南麓書後岱宗夫如何齊魯青未
了夫如何三字幾不成語然非三字無以成下
句有數百里之氣象若上句俱雄麗則一李長
吉耳此前人論詩也論書亦然若有學南麓書
者當以吾言參之

附元好問跋金國名公書任南麓書如老法家
斷獄網密文峻不免嚴而少恩使之治京兆亦
當不在趙張三王之下黃山書如深山道人草

衣木食不可以衣冠禮樂束縛遠而望之知其
為風塵物表黃華書如東晉名流往往以風流
自命如封胡羯末猶有醞藉可觀閭閻公如本
色頭陀學至無學橫說豎說無非般若百年以
來以書名者多矣宇文太學叔通王禮部無競
蔡丞相伯堅父子吳深州彥高高待制子文耳
目所接見行輩相後先為一時任南麓趙黃山
趙禮部龐都運才卿史集賢季宏王都勾清卿

許司諫道真為一時若亮承旨正書八分開閒
以為百年以來無與比者篆字則李陽冰以後
一人郭忠恕徐常侍不論今卷中諸公書皆備
而竹溪獨見遺正如鄴中賓客應劉徐阮皆天
下之選使坐無陳思王則亦不得不為西園清
夜惜也

西湖

西湖環武林澄澄大圓鏡仰看湖上寺即是鏡中影湖

光與天色一碧千萬頃堤徑截烟來樓臺自昏暝

濟南黃臺三首

滿目江南烟水秋濟南重到憶南游便欲移家漁市側
輕蓑短棹弄扁舟

柴扉水際晝還扃落日城頭晚更明深綠淡黃洲渚冷
敗荷無數似臨平

綠柳橋邊簇錦鞍紅沙影裏照烟鬟歸來書几高燒燭
渾似江鄉一夢間

蘇州宴

蘇州女兒嫩如水
髻聳花籠青鳳尾
十二紅裳釀梳洗
植立唱歌烟霧裏
一人丰穠玉手指
袖挽翠雲彈綠綺
落花一片天上來
似欲隨人渡江水
曲終宴闋歌一觴
行人南游道路長
明日松江千萬頃
烟波雲樹春茫茫
庚辰十二月十九日雪

馮夷濺水翻銀幾
北風浩浩如兵威
瓊臺玉樹壓金碧
三十六宮明月輝
五更待漏雞人唱
近衛臚傳九天上

須臾龍馭踏飛瑤萬戶千門寂相向皓齒才人宮袖窄
巧畫長眉梅半額含顰一笑競春妍繡勒錦韉生羽翮
城外雪深迴馬首別殿傳觴燈作晝歡聲一曲藉春謠
半夜西園滿花柳霑濡已見盈阡陌况是隆冬見三白
帝力如天人得知今慶明年好春澤

憶郎山

萬壑溪流合千峯木葉黃郎山五千丈獨立見蒼蒼

巨然山寺

孤撐山作碧螺髻漫散水成蒼玉鱗野寺荒涼人不到
水光山影正橫陳

浙江亭觀潮

海門東嚮滄溟濶潮來怒捲千尋雪浙江亭下擊飛霆
蛟蜃爭馳奮髯鬣鉅鹿之戰百萬集呼聲響震坤軸立
昆陽夜出雨懸河劍戟犇衝潰尋邑吳儂稚時學弄潮
形色沮濡心膽豪青旗出沒波濤裏一擲性命輕鴻毛
須臾風送潮頭息亂山稠疊傷心碧西與浦口又斜暉

相望會稽雲半赤詩家誰有坡仙筆稱與江山作勁敵
援毫三叫句不成但覺雲濤滿胸臆

附張才保定志任詢字君謨號南麓易人字入
聖畫入神性尤嗜畫

附書畫會要君謨山水在王子端下

附元王惲跋任龍巖烏夜啼帖南麓書畫京師
為最多其擘窠大書往往體莊而神滯獨此帖
豪放飛動超乎常度而木庵師謂醉後興逸妙

能天成豈長沙率爾而顛字字圓轉之意邪然
古人得意處非一如去乖就合意居筆先乘其
調利例多高風絕塵不只藉步兵作氣而能奪
三軍之氣也

又跋任南麓數珠帖

臨潯珍閣銘為大陽津張
提舉彥亨賦總一百八字

王子勉目
曰數珠帖

南麓書在金大定間號稱獨步然擘

窠大書往往體莊而神滯今觀此帖筆勢超逸
氣韻兼勝豈非抵掌談笑善學叔教者邪

馮臨海子翼

七首

子翼字士美大定人正隆二年進士性剛果與物多忤用是仕宦不進以同知臨海軍節度使事致仕居真定有詩樂府傳於世父仲尹子叔獻三世皆仕至四品職名亦相近士美詩有筆力如賦臨海乳山萬松堂為可見矣

三月七日登龍尾山寺

古寺尋龍尾山城送馬蹄花濃香膺胸泉瑩冷玻璃寒

食春無幾催歸日欲西春風吹病眼煙樹遠淒迷

佑德觀試經

琳館清深小雪殘釀梅天氣不多寒客窓竟日無人到
只有蕭蕭竹數竿

書事

客舍如僧舍秋風几席清竹孫仍帶籜鳩婦已呼晴年
老心情減官卑去就輕京師名籍甚鄭子豈其卿

和張浮休舊韻

嫩水籠篁碧新霜染樹紅石潭沉曉月山雨暝秋空燈
火吟窓下闕河醉眼中西風喚張翰南望思何窮

小圃茅亭新成

榆柳清陰下茅亭近水潛抵簷栽美竹橫榻賦新詩朴
陋從人笑棲遲止自怡歲寒天地肅松雪有心期

贈張壽卿

美如冠玉張公子知是留侯幾世孫老境流離少歡趣
天涯邂逅對清罇貂裘聊作西州客物化終同北海鯤

十日相從又言別
關山明月正銷魂

岐山南顯道冷香亭

溪橋小雪晴水村霜月冷
暗香林薄間得偶
璀璨影殷勤
南夫子移植在人境
芝蘭馥氤氲
珠璧照光炯
小屋茅草葢
幻此瀟灑景
看花熱松明
醒醉漱苔井
文章聊嬉戲
辭氣頗馳騁
州縣不著脚
時人笑清鯁
我官西州
採簿領
不知省
頻遭官長罵
勢屈石在頂
門庭可張羅
陋巷車轍靜
山歌聽嘲哂
舞伎或癯癯
引睡閱文史
朝

日無從永夢到五柳莊身居六盤嶺竭來南山下旅思
淒以耿金壘照衰朽玩味得俄頃傍人怪迂踈佳處當
白領

史明府旭

三首

旭字景陽第進士歷臨真秀容二縣令有詩一
卷傳於世臨真上元夜雪云斜風吹雪滿山城
壓屋雲低未肯晴天女散花春一色燭龍銜照
夜三更交口楊氏莊云青黃遶屋禾將熟紫白

依闌菊半開，差赴綏德云也。解笑人沿路菊不
堪供稅帶山田。先人嘗從之游，稱其時有佳句
云。

懷郭碩夫劉南正程雲翼

已將春夢等浮生，更著秋光比宦情。
薄有酒傾閒日月，苦無心向老功名。
黑城村晚鴉千點，白土坡高鴈一聲。
天末何人慰寥索，正思張丈與殷兄。

早發驂馳棚

郎君坐馬臂彫弧手撚一雙金僕姑畢竟太平何處用

只堪妝點早行圖

好問按景陽大定中作此詩已知國朝兵不可用此則詩人之憂思深矣

梨花

少年攜酒日尋花老去花前欲飲茶今日傳觴似年少
一枝香雪上烏紗

邊內翰元鼎

四十二首

元鼎字德舉豐州人兄元勳元恕俱有時名號

三邊德舉十歲能詩天德三年第進士以事停

銓世宗即位張太師浩表薦供奉翰林出為邢
州幕官復坐誣累遂不復仕進德舉資稟疎俊
詩文有高意時輩少及如云雲鐘號曉月風絮
亂春燈晚照入簾如有意春風過水畧無痕五
更好夢經年事三月殘花一夜風拂子云驅去
青蠅讒口遠拂開黃卷聖言新雲露月華天牛
白星移河漢夜微涼此類甚多

八月十四日對酒

梧桐葉彫轆轤井萬籟不動秋宵永金杯瀉酒灑十分
酒裏華星寒炯炯須臾蟾蜍弄清影恍然不是人間景
金波淡蕩桂樹橫好在玻璃千萬頃玻璃無限月光冷
瀕洞一色無纖穎清風颯颯四坐來吹入羲皇醉中境
醉中起歌歌月光月光不語空自涼月光無情本無恨
何事對我空茫茫我醉只知今夜月不是人間世人月
一杯美酒蘸清光常與邊生舊交結亦不知天地寬與
窄人事樂與哀仰看孤月一片白玉露泥泥從空來直

須臥此待雞唱身外萬事徒悠哉

早春

春風走塵沙鳥語滿京國東皇發潛潤土木變顏色桃李爭嫵媚白紅姹容飾唯有松栢姿依然蔽崖黑

村舍二首

何事區區守一丘春花過了月明秋等閒濁酒籬邊興
寂寞寒花雨裏愁不識故人今在否每思前事隔重游
西風又是青山晚落葉無聲水自流

牆外青山半在樓
山村晝晚雨聲愁
旃表臃腫無餘事
罇酒飄零又一秋
學得屠龍無用處
祇如畫虎反成羞
回頭為向淵魚道
鴻鵠而今不願游

懷友

曾聯金轡賞春風
花裏風前酒面紅
行樂昔年君我醉
持觴何日我君同
一聲啼鳥青春晚
幾樹殘紅野寺空
相憶情懷正蕭索
半山夕日水聲東

夜深

月落秋山萬象清
濕螢微近露枝明
夢魂黯淡家千里
鼓角淒涼夜幾更
弟子亡來鄉校冷
舍人別後子虛成
銀河漸轉梧桐黑
何處江湖望客星

春花零落

春花零落鴈秋悲
已過流年二十期
有舌能忘藏壁恥
無金莫怪下機遲
世情冷熱誰予問
人事升沈未汝知
何日上方容請劍
會乘風雨斷鯨鯢

出門騎馬

出門騎馬即三千面目塵埃動慘然生計若為田二頃
饑顏翻愧宦三年乾坤造物能無用富貴由時枉自鞭
達否從今已知計五湖煙裏有漁船

帝城

帝城回想夢魂中秋月春花在處同朱雀橋南三月草
鳳凰樓上四更風錦囊別後吟箋少玉笛閒來酒盞空
贏得當時舊標格九分憔悴入青銅

新香

新香終比舊香濃，只是相逢不久容。
繡被暫同巫峽夢，銀鞍多負景陽鐘。
寶檀煙斷閒金獸，玉鎖聲傳惱睡龍。
簾影漸分風又起，一塘秋水落芙蓉。

聞簫

弄玉吹簫玉瑄低，秋風散入滿天悲。
滄波夜漲龍吟細，琪樹霜風鳳嘯遲。
漢月有情如靜聽，蕭郎無路不相知。
秦樓虛負清宵意，惆悵乘鸞舊有期。

和致仕李政奉韻

車馬年年陌路塵安知六驥過窓頻雲泉是處堪為樂
軒冕從來只累人浮世夢中無限事紅顏花上霎時春
五湖興有扁舟笛好在晴天月一輪

別友

從來雞鶴不同羣涇渭何人與細分鏡裏光陰誰念我
雲中歧路已饒君清觴且吸年時月白雪休徵夢裏雲
別後相思不相見水邊黃葉暮山村

送妹夫之太原

山含秋氣冷參差送客西城落日低怨別弟兄歸快快
戀鄉車馬去遲遲浮萍聚散元無定流水東西却有期
惆悵黃榆故山路碧天回首鴈南飛

惜春

春來春去惱春晴花落花開又幾經夜雨多情愛沾灑
楊花無賴只飄零每成宴賞須成醉不恨歸來却恨醒
眼見紅英留不住綠枝深處一星星

客思

客思逢春易感傷，不堪殘淚滴家鄉。
離親恍惚來千里，餽口淒涼在四方。
羞向孫劉圖富貴，浪從李杜學文章。
官街坐對黃昏月，半屋清燈滿地霜。

暮鐘

落日行人斷，深秋暝雨殘。
一聲烟樹外，千里暮山寒。
倦鳥方知止，哀猿冷不安。
蕭蕭風葉下，時與野僧還。

夢斷

繡枕紅衾晚意濃，啼嬰大似不相容。
夢魂苦恨歸來早。

不盡瀛洲第一峯

花開人散二首

花開人散正消魂
花語無情獨閉門
看即春光留不住
一聲啼鴉又黃昏

閒花閒草滿芳洲
春水無人自在流
白日遲遲倦游子
一聲啼鳥一聲愁

聞笛

雌鷺無鳳怨西風
月女愁寒淚灑空
牙板急隨聲不斷

滿天敲碎玉玲瓏

王文伯還家詩以迎之

陌上東風故國春
瘦驂羸僕倦行塵
十年一夢成何事
千首新詩不負人
重對孤燈聽軟語
遞憐華髮各清貧
西齋煙草應如舊
桃李新溪滿四隣

晚行

隔浦行聞晚寺鐘
斷坡寂歷對寒松
蒼煙暮合孤城晚
破月微昏遠岫重
宿翼飛投空自急
斷蓬無計竟何從

新年又入應添歲歸把青銅怨暮冬

山中

世路風波老不禁一屢歸買就槐陰坐詩為累言難解
因酒成狂病轉深山月荒涼窺斷夢壁燈青黯伴微吟
十年積毀應銷骨豈礙孤雲萬里心

自歎

終日忘言一炷香散花時復遶繩牀久貧自沃三彭熾
一醉齊休六賊狂道士生涯孤似鶴衲僧門戶冷於霜

自知衰病耽杯酒擬及溫柔老是鄉

新秋示友

一頃山田半已蕪閉門高臥著潛夫不才分作溝中斷
舊好誰瞻屋上烏南阮強須攀北富東丘何用歎西愚
自憐幽默相忘久鬪鳥鳴蟬枉叫呼

偶題二首

當年樂事歎今衰人世空驚日未移風榭醉眠摧鳳燭
雨窓狂飲殢蛾眉長松茂草窮年事野水孤村入夢時

強緝鬢絲臨晚鏡
瞥然塵念不勝悲

短髮臨風懶不冠
窪罇塵坐寂無歡
離騷夕賦醒尤獨
孤憤空書說轉難
晚節慣成林壑僻
幽居深入水雲寒
蒼崖瘦栢無窮思
鵲立溪頭盡日看

新居

鏡裏巖花落澗泉
對窓青壁便參天
幾當雪月開春酒
時有松風入夜絃
遠劖山田多種黍
稀經城市少言錢
平生漫忽王公貴
俯仰村隣更可憐

閒題

十年一夢到灰心歸鬢吳霜漸欲侵物外少逢稀有鳥
冶中仍作不祥金閒雲閣雨中何事枯木因風亦自吟
却歎淵明非達道無絃猶是未忘琴

答文伯二首

老情無賴畏虛勞已絕朱絃又一操閒事每來知酒聖
浮生欲去愧僧高息心鐘鼎休看鏡安枕茅茨不夢刀
遙羨郭西王處士道傍羸馬咏風騷

曉窓清鏡卷浮埃恨入新秋不可裁
露浥野花三徑合風傳雲壑七松哀
忘機魚鳥真相識落手功名亦儻來
萬古消沈一杯酒只須白骨點蒼苔

閱見一十首

君居淄右妾河陽平白相逢惹斷腸
蠟燭已殘歌欲闕併教離恨遠飛梁

蕭史吹笙鳳女臺月高霜冷鳳笙哀
不堪好酒沈沈夜又遣青鸞獨自來

鳳紙銜封玉鏡臺繡鸞傳記已相猜傾城笑臉千金樣
莫對閒人一例開

歌裏冲冲笑裏嗔深情會處幾何人憑君為向五陵道
冶葉倡條不是春

笑裏低眉引醉波閨風秋月一聲歌明知畫燭無情物
何事樽前淚更多

笑不成歡歌斂眉景陽鐘動酒闌時此情却羨牽牛會
一歲相過可是遲

牛女佳期歲一過都緣迢遞隔金河可憐馬上香車畔
只隔珠簾更不多

輕蓮素質澹蕭蕭葉密溪深未可招雨暗蘭舟人去後
却容白鷺逞風標

雙鸞夾鏡鳳橫釵捧額黃梅小鴈排為報阿環休調戲
雙成西母總相猜

膩髮堆雲鏡舞鸞五雲仙洞接清歡歸來失却吹簫伴
腸斷崑山昨夜寒



御訂全金詩增補中州集卷二十三

欽定四庫全書

集部

御訂全金詩增補中州集卷二十五

詳校官中書臣張虎拜

主事銜臣徐以坤覆勘

總校官編修臣王燕緒

校對官編修臣勵守謙

謄錄監生臣黃嘉績

欽定四庫全書

御訂全金詩增補中州集卷二十四

李承旨晏

七首

補五首

晏字致美高平人唐順宗第十六子福王綰之
苗裔父森字彥實工於詩有云少年日日醉花
邊短白長紅一一憐自笑老來心尚在惡風常
廢五更眠又賦梅云冰骨有香魂乍返玉顏無
暈酒全消人多傳誦之致美皇統二年經義進

士釋褐臨汾丞時張太師浩判河陽一見愛其
才為之延譽稍遷遼陽幕官與興陵有藩邸之
舊入翰林為學士高文大冊號稱獨步拜御史
中丞初遼人掠中原人及得奚渤海諸國生口
分賜貴近或有功者大至一二州少亦數百皆
為奴婢輸租為官且納課給其主謂之二稅戶
大定初一切免為民間山寺僧賜戶三百與僧
共居供役而不輸租故不在免例訴者積年臺

寺不為理又訴於致美致美上章大畧謂天子
作民父母當同仁一視分別輕重乃胥吏舞文
法之弊陛下大明溥照豈可使天下有一民不
被其澤者且沙門既謂之出家而乃聽其與男
女雜居乎書奏宰相持不可世宗召致美與相
詰難致美伏御座前曰前日車駕幸遼東閭山
寺曾供從官一宿之具寺僧物陛下物也陛下
無以此直寺僧而使三百家受屈世宗大笑曰

李晏刼制我耶即日免之明昌初為禮部尚書
分諸道府試復經義設經童科皆自致美發之
出為沁南軍節度使告老不從改昭毅軍節度
使且授子仲畧澤州刺史以榮之時澤潞旱甚
致美擅發倉粟三萬石救餓者因上章請罪章
奏而本道提刑彈章亦至章宗謂宰相言提刑
職當然李晏義當然不之罪也仲畧字簡之大
定二十二年進士仕至山東路按察使道陵愛

其俊快比為脫帽鶻云致美自號游仙野人簡
之丹源釣徒有集傳於世簡之之子肯播字克
紹肯獲字克守肯德字克修

白雲亭

白雲亭上白雲秋桂棹蘭橈記昔游往事已隨流水去
青山空對夕陽愁興亡翻手成舒卷今古無心自去留
獨倚西風一惆悵數聲柔櫓下汀洲

贈燕

王謝堂前燕秋風又送歸向人如惜別入戶更低飛海
濶迷烟島樓高近落暉不知從此去幾日到烏衣

通州道中

冉冉年華老飄飄客路難塵埃山色斷雲霧日光寒念
遠心先折孤吟鼻亦酸平生江海意潦倒愧儒冠

高麗平州中和館後草亭

藤花滿地香仍在松影拂雲寒不收山鳥似嫌游客到
一聲啼破小亭幽

題武元直赤壁圖

鼎足分來漢祚移，阿瞞曾困火船歸。
一時豪傑成何事，千里江山半落暉。
雲破小蟾分樹暗，夜深孤鶴掠舟飛。
夢尋仙老經行處，只有當年舊釣磯。

遊龍門回投超化寺

精藍三日飽溪毛，俗累紛紛覺可逃。
探水尋源通月冷，披榛得路接雲高。
山圍故壘懷千古，河轉孤巖激怒濤。
回首烟霞應笑我，人間官職倍徒勞。

金天日曆卷二十四
卷二十四
還邀二三子共到鑿龍遊冷壑泉初動春巖氣欲浮竹
藏深掩寺人渡晚行舟始覺山風急歸鞍不自留

潞州形勝

東迎壺口疊羣山吞吐嵐光紫翠間削玉遠排珪首銳
暈痕輕拂黛眉彎五龍飛去松杉老萬井喧囂日月閒
遊客乍醒塵土眼仙扃誰指扣玄關

白巖山二首

只有山光無水聲我疑神物固巖扃如何鑿得飛泉出

當為山僧叱六丁

山寺尋春春已歸紫梅猶有折殘枝老僧兀坐如枯木

花謝花開總不知

白巖寺羣山環抱村落相望亦奇觀也惜乎無水因作絕句書石應有水

出

嗅梅圖

朧朧霽色冷黃昏
缺月疎籬水外村
人在天涯花在手
一枝香雪寄銷魂

蓮塘陪諸公賦

潦倒何堪接俊遊
神仙空羨李膺舟
官曹只在空湖畔

簿領如山屋打頭

省幕在城外
極卑陋故云

王都運寂

七首

寂字元老薊州玉田人系出三槐父礪字鎮之

國初名士仕至歸德府判官元老天德三年進

士興陵朝以文章政事顯終於中都路轉運使

壽六十七謚文肅有拙軒集北遷錄傳於世三

子欽哉直哉鄰哉俱為能吏元老專於詩有云

生涯貧到骨家具少於車元夕感懷云殘夢關
河鼇禁月舊遊燈火馬行春留別郭熙民云五
年風雪黃州閨萬里關河渭水秋與涿郡先主
廟詩當年竹馬戲兒曹兒指樓桑五丈高故國
神游得毋恨壞垣風雨夜蕭騷人共傳之行記
載其先人雞山一詩云記得垂髫此地遊雞山
孤立水平流而今重過山前路山色青青人白
頭予謂詩固佳恨其依倣蘇才翁太甚耳

易足齋

吾愛吾廬事事幽，此生隨分得優游。
窮冬夜話蒲團暖，長夏朝眠竹簟秋。
一榻蠹書閒處看，兩盃薄粥飽時休。
紅旗黃紙非吾事，未羨元龍百尺樓。

送張仲謀使三韓

照海旌幢出樂浪，過家上冢路生光。
鴨江桃葉朝迎渡，馬嶺松花夜煮湯。
恩詔肅將芝檢重，醉鞭低裊玉鞘長。
遺民笑指天車道，酷似南陽異姓王。

高麗稱中原使節
皆曰天車某官事

見闔子秀
鴨江行記

自東營來廣寧道出牽馬嶺經梁利器墓下

毀譽譏謔息蓋棺百年春夢大槐安功名倒挽九牛尾
富貴真成一鼠肝故國鶯花人事改空山風雨夜臺寒
平生老我心如鐵醉眼西州淚不乾

黃桃花

應嗔國色朝酣酒賜與羽衣如太真道士厭看千樹老
令君別換一城新緬梅拂額更不俗粟玉削肌殊可人

想得乞漿尋舊約東風不似去年春

沁水山寺

兩峽山高月半輪五更人起馬嘶頻無端又上長安道
輸與僧牕飽睡人

奉題少保張公曲阿別墅二首

休沐時時散馬蹄綠陰如染轉長堤帝城和氣融春圃
相國餘波到兩溪無數龜魚欣作主不言桃李自成蹊
聖時正要傳遺事賀監從渠老會稽

鍾湖亭下水淙淙綠野平泉未易雙十里藕花紅步障
一軒松影碧油幢洛中獨樂有司馬天下不名知曲江
紙尾欲煩賢宅相雨蓑添我坐蓬窓

附長安客話涿州境東南有漢盧植墓土人呼
為南臺金王寂詩南臺故址今頽然漢盧植墓
疑相傳

蓮峰真逸喬辰 一首 補二首

辰字君章初名逢辰洪洞人天德三年進士詩

樂府俱有名子宇宇德容八歲能鼓琴召入東
宮顯宗稱其不凡大定十六年登科貞祐初為
益都按察轉運使與田泳器之俱歿兵間

附元好問琴辨引彥實苗君平陽人童州中為
鄉先生喬孟州辰君章所器命其子河東按察
轉運使宇德容與同研席君章文學深博兼通
音律教彥實與德容琴事初授指法累錢手背
以輕肆為禁至一聲不敢妄增損彥實後以雅

重見稱有自來矣弱冠應明經舉選三赴廷試
至論知琴亦與德容相先後當熙宗守成之際
惟弄琴為樂而已琴工衛宗儒者一日鼓琴不
成聲問之故曰山後苦寒手拮据耳即賜之貂
鼠帳熾炭其前使鼓之世宗好此藝殊有父風
寢殿外設琴工幕次鼓至夜分乃罷嘗言吾非
好琴人主心無所住則營建征伐田獵寵嬖何
所不有吾以琴繫著吾心耳一侍從鼓琴東宮

衣著華麗上以輕浮勅不得入宮至顯宗又妙於琴事者也三四十年之間此道大行而彥實出於其時近臣有薦於章廟者因得待詔翰林居京師未久而聲譽籍甚至廢舉業不就南渡後日從楊趙游閒閒嘗有詩推敬故詩人止以高士目之公藝既專又漸於敦朴之化習與性成其分別古今操弄孰雅孰鄭猶數一二而辨黑白也常選古人所傳操弄百餘篇有古意者

纂集之將傳於世危急存亡之秋良未暇也長
子名某字君瑞嘗仕為省郎閤居燕中悼雅道
之將廢而先意之不究將斲木以傳請予題端
且以卜當傳與否也予為君瑞言子第傳之山
谷有云枯木嵌空微暗淡古器雖在無古絃袖
中正有南風手誰為聽之誰為傳東坡有云琴
裏若能知賀若詩中定合愛陶潛予竊謂南風
手不可得而今世愛陶潛者幾人果如坡谷所

言惟當破此琴為烹鶴之具耳夫八音與政通
為難審音以知政居今而行古又為難合是二
難始有此書乃欲藏之名山以待其人乎司空
表聖最為通論云四海之廣豈無賞音固應不
待五百年耳請以此為之引歲丁巳秋八月初
吉遺山詩老引

凌虛堂

木暗蒼烟合池荒碧草深高臺平竹杪幽徑入花陰奔

走成何事登臨慰此心
晚涼山更好風處一披襟

興慶夜月絕句

花萼樓傾有故基
行人空讀火餘碑
可憐興慶池邊月
曾伴寧王玉笛吹

翠貞菴訪晦之不遇

飛錫南遊久未歸
北藍清勝與誰期
明牕但見橫經處
靜坐還思酌茗時
獨誦隔林機杼句
漫題渴井轆轤詩
翠貞菴外千竿竹
嘯月吟風待阿師

劉左司昂

一十一首

補一首

昂字之昂興州人大定十九年進士曾高而下
以科名相踵者七世矣昂天資警悟律賦自成
一家輕便巧麗為場屋捷法作詩得晚唐體尤
工絕句往往膾炙人口張秦娥者頗能小詩其
賦遠山云秋水一抹碧殘霞幾縷紅水窮霞盡
處隱隱兩三峯其後流落之昂贈詩云遠山句
好畫難成柳眼多才總是情今日衰顏人不識

倚爐空聽煮茶聲又云二頃山田半欲蕪子孫
零落一身孤寒牕昨夜蕭蕭雨紅日花梢入夢
無娥為之泣下屏山故人外傳記之昂早得仕
年三十三省掾考滿授平涼路轉運副使人謂
卿相可坐致矣術士有言之昂官止五品者之
昂自望者甚厚不信也俄丁母憂為當塗者所
忌連蹇十年卜居洛陽有終焉之志有薦其才
於道陵者秦和初自國子司業擢左司郎中將

大用笑會遼陽人大中欲搖執政賈鉉為言者
所劾辭連之昂道陵震怒一時聞人如史肅李
著王宇宗室從郁皆譴逐之鉉尋亦罷政之昂
降上京留守判官道卒竟如術者之言

醉後

禪僧勸讀傳燈錄道士教行進火功今日興來俱破戒
黃花籬落醉西風

山中雨

嵩高山下逢秋雨，破繖遮頭過野橋。
此景此時誰會得，清如憲下聽芭蕉。

都門觀別

買酒消閒愁剪刀，剪流水閒愁不可消。
流水無窮已悠悠，牕下斷腸波總是行人墮。
淚多門外馬嘶思遠道，小
頃猶唱渭城歌。歌聲未斷征鞍發，
望斷垂楊人影滅。斜
陽照影却歸來，兩地相望今夜月。
閒人多矣，主人翁離
別都歸一笑中。陌上行人終不悟，
年年楊柳怨春風。

客亭

折盡官橋楊柳枝
春風依舊綠絲絲
啼鶯為向行人道
離別何時是盡時

山堂

山雨溪邊過山堂
夜獨吟悠悠松上月
照見壁間琴

弔張維翰維中兄弟

蓮幕清曹粉署仙
福兮禍倚豈其天
座隅異物鵬來止
地底佳城馬不前
萬里青雲今已矣
兩枝丹桂竟徒然

阿奴莫愛聲名好碌碌持家亦自賢

維翰名甫第一人擢第維中名庸此

榜乙科阿奴謂冉冉字維賢後以省元登科兄弟科名如此近世所未有也

即事二首

雨洗明河畫扇收
胡牀露冷藥闌秋
牆陰未得中庭月
一點螢光草際流

山花山雨相兼落
溪水溪雲一樣閒
野店無人問春事
酒旗風外鳥關關

歌風臺

劉頂興亡轉燭過亂蟬吟破漢山河長陵臥老咸陽月
沛上猶傳擊筑歌

弔李仲坦

仲坦物故後省試
魁始有特恩之命

文章巧與世相違身後新恩事已非不及萋萋原上草
一番春雨綠如衣

王官谷

潛溪時照塵埃客微雨不遮天柱峯斜日落花人去盡
淡烟樓閣數聲鐘

一峰凝碧倚晴空一水縈紆一徑通中有幽人曾說古
誰知高興與今同

附堯山堂外紀劉之昂山中雨詩曰嵩高山下

逢秋雨破傘遮頭水沒腰

中州集作
過野橋

此時此景

誰會得清如牕下聽芭蕉祝枝山誦此詩嘗哂
其上下淋漓清在何處

魏內翰搏霄

三首

搏霄字飛卿初用蔭補以薦書從事史館明昌

中宏詞中選授應奉翰林文字未幾卒飛卿詩
以富艷稱如張公子席間賦嵩山筆力豪逸党
承旨許其在劉無黨之上云

送河南府尹張壽甫赴闕

夜半恩綸出漢宮朝家虛席待燕公春風已徧湖山外
元氣還歸鼎鼐中侍從定誰陪白鳳低回空自惜冥鴻
洛川萬頃蒲桃碧長與清愁日夜東

田若虛遊龍門寶應用天隨子體賦詩因次其韻

二首

少室右臂禹所斷開排清伊來高寒土肉養石自古秀
山腰流泉無時乾佛髻滴滴染濕翠松風颭颭鳴驚湍
白傅已矣不可見予誰從之投歸鞍

闕塞若廐馬奔騰多竒龐慙爾不可沮西來何慳慳駿
足忽勒破英才如拘虓有客善體物新詩留僧牕晏革
豈足道微瀾生盆缸徑續杞菊意來浮玻璃江吏部昔
竄謫猶能題臨瀧況此六大寺礎堂時鳴椿紫翠出萬

金史紀事本末卷之二十四
瓦天風旋珠幢興寄百斛鼎無才誰其扛會聽項籍約
吾將從之降

御訂全金詩增補中州集卷二十四

欽定四庫全書

御訂全金詩增補中州集卷二十五

許內翰安仁 六首 補二首

安仁字子靖河間樂壽人大定七年進士歷禮部員外郎出守澤州遷同知河南府事以汾陽軍節度使致仕子古字道真父子俱名流也

補金史安仁為澤州刺史作無隱論上之凡十篇曰本朝曰情欲曰養心曰田獵曰公道曰養

源曰冗官曰育材曰限田曰理財

望少室

名山都不見真形萬仞盤盤入杳冥安得雲間騎白鶴
下看三十六峯青

送二道者歸汾州

介休山下兩閩人來訪汾陽舊使君明日却歸塵外去
一雙白鶴上青雲

草木蟲魚詠二首

蠅鑽故紙竟不悟，蛾撲明燈甘喪生。
大似盲人騎瞎馬，不知平地有深坑。

蓬在麻中應自直，萬生松下亦能高。
不關若輩工攀附，物理由來繫所遭。

少室道中

少室峯頭曉月沈，千家城郭淡陰陰。
五更雞唱殘星滅，馬上看山過少林。

遊泰安竹林

蕭寺天教勝處安峯巒騰擲水雲閣客來總說遊山好
不道山僧却厭山

遊法輪院

太行岡嶺橫漫漫撐空一帶雲霞間巨鰲背負九州出
重重山上復有山高都城頭見松嶺突兀雙峯螺髻並
招邀析城揖王屋指顧硤石瞰天井蕭蕭楓葉滿山秋
巖巒掩抱雲林幽攀崖轉壑路欹側雖有佛刹誰曾遊
年豐郡邑閒無事琴酒招呼二三子題詩古壁贈山僧

畧記衰翁曾到此

少林寺

巖壑深巖入翠微少林金碧露烟霏五峯屏簇禪菴小
萬劫天開佛日輝聞說九年深面壁得逢二祖便傳衣
千秋少室山靈在曾見神僧雙履歸

附嵩嶽志少林寺西北里許五乳峯下有達摩
庵又深入里許為達摩面壁庵面壁石在庵前
上有達摩洞又寺西南為二祖菴寺南為少室

山金許安仁有詩云云

附遺山集眼醫許太丞彥清示其從祖汾陽君
山水圖詩語意高妙而其字畫與明昌龍巖黃
華黃山諸公各自名家世尤寶惜之其子右司
諫道真亦以能書稱今以汾陽筆法較之父子
如出一手生平亦嘗見蔡太學安世大丞相伯
堅濰州使君伯正甫三世傳字學雖明眼人亦
不能辨前輩守家法類如此汾陽守澤州日戒

子云婁相任唾面周廟貴緘口寸陰大禹惜三
命考父走吾河東人至今傳頌之司諫在貞祐
興定間直言極諫與陳公正叔齊名時號陳許
父子名流在中朝百餘年少有似者而彥清承
其後何其幸耶此詩渠家青檀其實惜之當令
後人知世德之所自云

王隱君碣 一十三首

碣字逸賓先世家臨洺至逸賓遂為汴梁人博

學能文不就科舉孝友天至非其食不食家無

甌石之儲晏如也明昌中故相馬吉甫

惠迪判開

封舉逸賓王彥功游宗之德行才能逸賓得鹿

邑主簿就乞致仕彥功以親老調鞏州教官宗

之讓不受三人者雖出處不齊而時人皆以高

士目之閒閒公嘗集黨承旨趙黃山路司諫劉

之昂尹無忌周德卿與逸賓七人詩刻木以傳

目為明昌辭人雅製云

附趙秉文遺安先生言行碣先生姓王氏諱礪
字逸賓其先臨洺人先生實生於汴梁嘗以洺
川自稱不忘本也自幼穎悟絕羣外頗如也初
學詩於伯父震落筆驚人震自以為不及未幾
詩名大震加之孝於親友於弟誠於人篤於已
遠近論大行必曰王逸賓矣初孟公宗獻友之
馮公璧叔獻趙公澗文孺皆師尊之先生天性
謙至待之反若居已上及數公相繼魁天下俱

直玉堂然後先生之道益尊名益重朝賢兩薦
明德先生以書抵故人之位清要者苦以親老
為辭議遂寢明冒末聖天子詔舉德行才能之
士鄉人耆德諸生五百餘人薦先生孝義忠信
文章為世師表朝廷以素知名特賜全進士授
亳州鹿邑主簿先生年幾七十矣以目苦昏暗
即日移文有司以老疾乞致仕朝廷猶以半俸
優之首算先塋次以分惠親舊計月而盡泰和

三年八月二十有七日以疾終於家臨終神色
不變戒其子棺周於身足矣語畢而逝葬於祥
符縣魏陵鄉蕭氏之園先生教人先行後文與
人交終始不易居喪齋蔬哀服不去身三年與
二弟同居終身無間言平居循循醇謹視若無
能為至不義矯如也其詩沖淡簡潔似韋蘓州
嘲戲風月一言不及也所與遊皆世知名士若
文商伯起張公藥元石及其子觀彥國王琢景

文師拓無忌鄺權元與高公振特夫王世賞彥
功王伯溫和父左容無擇游道人宗之路鐸宣
叔右丞唐古丈正公鎮南都以禮致之不能屈
及與貧士談饑坐終日不知誰為主誰為客也
嘗冬日詣一親知家會坐客滿主人貧宴為代
給所須坐客疑其寒色物色所得乃典錦衣以
贈也喪其母鄉鄰或賻以布帛拜而受之異日
復歸其人曰吾親安吾貧義不可受也其廉介

類此其真純之德卓絕之才淵深之學廉正之
操黃叔度陶淵明元紫芝司空表聖之徒歟秉
文明昌間參河南轉運幕過相謁坡軒居士酈
元輿居士曰君知王逸賓乎斯人當今顏子也
君不可不埽門求見之既見曰酈公知人矣自
是之後虛往實歸及其重來墓木已拱嗚呼使
子雲見之不當絕嘆於李仲元蘓元明見之不
當見稱於元子不意千古之下復有斯人乃伐

石樹碣用旌不朽於是為之銘銘曰居今而行
古身晦而名章不獨以詩昌猗

暮春郭南

大梁城外孤臺傍烟昏水碧春林芳憑高極目見歸鴈
風物令人思故鄉紫金山下斜陽暮萬里川光照雲樹
山間細雨花落時何人來往東風路

記南塘所見簡孟友之

大橋南郭野橋東十里垂楊十里風渺渺烟波連御道

離離雲稼入郊宮
雨滋蔓草曉逾綠
日暎荷花晚更紅
登覽只宜開笑口
尊前六客四衰翁

次文遠韻

野性唯便閬寂居
蒼苔鳥跡滿庭書
林花過雨紅猶重
籬竹和烟翠亦疎
已與農人成保社
更令兒輩學耕鋤
賞音只有東郊客
日袖新詩到敝廬

謝竹堂先生見過

學稼古寺側
結廬高柳陰
音書故交絕
歲月杜門深
新

雪添衰鬢寒灰死壯心西州賢別駕連日肯相尋

次友之秋日雨後韻

洺川秋雨後幽勝可供閒白首留他縣歸心遶故山野
泉來竹底危磴入雲間尚記登高會重巖細菊斑

寓居南村

朝來出門無所適野徑雨晴沙不泥鼓笛誰家賽春社
杖藜隨過柘岡西

雜詠七首

陰陰綠樹暗庭除
散盡鳴禽靜有餘
獨對爐薰坐終日
會心惟有漆園書

瓦爐柏子細烟消
閑讀禪經破寂寥
風細月高人已靜
隔牕疎竹夜蕭蕭

晴日南溪物色饒
草茅新綠凍全消
金絲柳底洲沙沒
數尺流波拍夜橋

南畝東臯春務時
田家候雨罷耕犁
却汲井泉澆藥圃
更疏陂水灌麻畦

竹繞沙村水漫流
鴉鵲鷓鴣對沈浮
一竿便擬從漁父
卷置琴書買釣舟

屋頭叢木撼蒼烟
風卷飛花到枕邊
南寺有僧來問字
打門驚覺午牕眠

漢梁王苑古臺西
秋思紛紛獨杖藜
雲壓高城鴈飛盡
一聲寒角夕陽低

劉治中濤

六首

濤字及之夏津人明昌二年同進士用戶部尚

書孫鐸薦入翰苑歷太原運副汾州倅入為太
子贊善以彰德治中致仕尋卒沁南節度康瑋
良輔葬之林慮之寶巖

小雪

黃紬被暖起還慵小雪經簷落旋空舊館簿書寬牛餉
冷官庭戶滿西風馬遭糞窘三山瘦人坐詩工五鬼窮
安得東風囑桃李也教春色到哀翁

和德卿雪

南華香火是真依不學呼鷹雪打圍梁苑舊遊荒徑改
潁濱新唱綵箋飛春生東閣酣朝飲寒入西鄰泣夜機
夢寐扁舟釣江水重嗟白髮此心違

井陘

寒厭歲崢嶸山陰日少晴敗眠雞小梗勸坐火多情
轆嗟長路艱難愧老兵誰教戀升斗盡室此途行

宿平遙集福寺

院僻和僧靜門閤與晝長燕泥朝雨淖蝶葉晚風香野

興煎詩思乾愁繞客腸青奴如解事供我暮牕涼

送王純叔守曹州

柏路人看御史驄年來眼落簿書叢單車乍別金鑿月
五馬頻嘶玉勒風故國山河連小鄆舊家雞犬識新豐
遙知別後詩成處醉袖淋浪蠟炬紅

戲用前人語別天平別墅

表聖當年絹五千休休亭下買林泉黃華面目君還見
天柱峯高不值錢

劉左司中 二首

中字正夫漁陽人屏山故人外傳云正夫為人
短小精悍滑稽玩世中明昌五年詞賦經義第
詩清便可喜賦甚得楚辭句法尤長於古文典
雅雄放有韓柳氣象教授弟子王若虛高法鵬
張履張雲卿皆擢高第學古文者翕然宗之曰
劉先生以省掾從軍南下改授應奉翰林文字
為主帥所重常預秘謀書檄露布皆出其手軍

還授左司都事將大用矣會卒有文集藏於家
周德卿嘗謂正夫可敬從之可愛之純可畏皆
人豪也

冷巖公柳溪

斗印輕拋繫肘金故園風物動歸心柳含烟翠絲千尺
水寫天容玉一尋山色只於閒裏好風波不似向來深
人間桃李栽培滿換得溪南十里陰

龍門石佛

鑿破蒼崖已失真又添行客眼中塵請君看取他山石
不費工夫總法身

路司諫鐸二十六首

鐸字宣叔伯達之子與弟鈞和叔父子俱有重
名而宣叔文最奇尤長於詩精緻溫潤自成一
家任臺諫有古直臣之風貞祐初出為孟州防
禦使城陷投沁水死有虛舟居士集得之鄉人
劉庭幹家

補金史路鐸為景州刺史述十二訓以教民上
詔曰路鐸十二訓皆勸人為善遍諭州郡使知
之

書州驛壁

雉堞俯已見羊腸行尚難炊烟界沮水老木識喬山時
廢無人弔臺高有鳥還客懷秋館雨未老鬢先斑

王子端挽辭

才名如此不償窮再入承明一病翁白髮光陰文字裏

金史四庫全書
卷二十五
黃華林麓畫圖中謫仙猶想屋梁月名士空懷松下風
聊應世緣緣故在會看歸鶴語遶東

慶壽寺晚歸

九陌黃塵沒馬頭眼明佛界接仙洲清溪照眼紅葉晚
禪榻生涼碧樹秋少室宗風闡棒喝裕陵遺墨爛銀鈎
對談不覺山銜月只為松風更少留

賦丈室碧玉壺善甫賦詩鐸亦奉和二首

心知雲路等榆枋戲作方壺當玉堂虛靜自應詳止止

逍遙均是一蒼蒼
心含寶月無中外
身著青霞可頽頽
政爾天遊到無始
覺來誰送竹風香

隨人作計魚千里
知命無憂鳥一天
碧落雲深堪避世

碧落洞名九華烟暖可忘年
平章萬有歸玄覽
收拾方心入

大圓上界真人自官府
不妨聊作橘中仙

次韻答季通

華顛何意軟紅塵
霄漢聊收退鷁身
方喜長松倚東野
又從淨社得遺民
高山流水知音少
霽月光風發興新

賴有好詩相慰藉不然開口欲誰親

雨中

月翳有時吐風薰俄自清雲迴暑天影雨進夜牕聲
眠聽叅天籟神遊得化城覺來還故處飢鼠撼燈檠

輞川

畫圖風景是亭榭歲年非秋色半黃落人烟深翠微
暗溪魚得計杳靄鳥忘機觸物增惆悵吾廬早晚歸

高唐劉氏駐春園

風光去人無咫尺人自塵勞不相及此心既定境從之
雪樹霜林亦春色劉翁有道久陸沈十年種樹今成陰
醉鄉天地白日永鷓鴣栗留皆好音良辰行樂今已矣
依舊東流泛蘭芷誰道青春挽不留鯉庭看取新桃李
膏車秣馬吾將歸澹與清景相追隨安用苦求三徑資
明月常滿千家墀

赫仲華求賦鄴臺張氏野堂

白沙翠竹小江村路轉西郊隔市塵入坐好山如有素

忘情鷓鴣鳥澹相親芋魁飯豆平生足澗草巖花各自春
得酒誰能更羈束不妨倒著白綸巾

題鄒公所藏淵明歸去來圖

牛刀小試義熙前一日懷歸豈偶然有意候君門外柳
無機還我酒中天貞姿佳菊秋霜裏真意南山夕鳥邊
善學展禽唯此老萬人海裏小斜川

衛州贈子深節度

淇上風光萃一樓尊前北海百無憂平分玉鑑漁村晚

西望黃雲寡婦秋

望一作卷

斜照鈎簾納煙翠微颺高枕看

安流梅天消息和羹近老穉寧容挽鄧侯

潼關

樓迴臨飛鳥車行汗十牛地靈開翠壁天遠送黃流趣
戰知奸計當關豈壯猷天梯且失守況說土山頭

七夕與信叔仲荀會飲晚歸有作

秋香瀉月笑談香飲散歸來夜未央闕角星河搖淡影
柳行燈火試新涼雄飛勳業歸時輩信美江山著漫郎

萬事浮雲心鐵石休將梁國嚇蒙莊

襄城道中

有古長官
暴橫者

禾黍低風汝水長遲遲驛騎困秋陽病軀官事交相礙
夢雨行雲肯藉涼盡說秋蟲不傷稼却愁苛政苦於蝗
詩成應被西山笑已炙眉頭尚否臧

感寓

汧汧一水抱山流路轉岡陵到渡頭張翰秋風動歸興
惠崇烟雨著孤舟祿輕道重從三黜日暮人遙發四愁

世事悠悠莫回首聊憑酒聖作天游

冠氏雨中

氣肅關河萬綠摧
遠遊節物動悲哀
人牛不見曉烟重
草樹有聲山雨來
老矣何堪米鹽事
中之安得聖賢盃
遙憐鶴髮孤雲底
日望林梢一葉迴

細香軒三首

花氣爐烟總不同
巽青噴翠小牕風
中邊故嗅渾無有
心跡相忘忽暗通

閣雨含雲戶牖涼聞機才發興何長無心孤竹那能爾
自是詩人知見香

霜雪青青玉一叢肯從桃李藉薰醲不知香界何從立
憑仗清風問籀龍

芳梅如佳人贈襄城衛昌叔

芳梅如佳人不見令人思豈無桃李顏夏蟲篤於時霜
風靜天宇蘭悴菊亦衰凌寒一笑粲功烈如彼早幾年
幽西路緒罔望遠思之不得見空吟水曹詩夜月將

夢去雲深水之湄
邂逅疎竹邊
我認風儀今日真見
止昨夢猶著龜塵中
儻儻子謂我酷好奇
逃空聞足音
此心胡不夷

遂初園詩

開闢堂

行邁已自勞
坐忘猶有為
動靜二塵耳
一真非即離
舉頭見青山
曲肱轉黃鸝
心安萬境寂
境轉何妨隨

思玄堂

塵世一何隘
永懷耿中情
端著得吉卜
有鶴戾天鳴
慨

然趣予裝雲旗渺遐征鴻濛偶相值笑我勞經營駕言
還故鄉方寸以道寧先疇理耘耔初服紉芳馨諦觀九
州事曾不出戶庭漁父有默識舖糟愈於醒

汴梁公廨西樓二首

官舍誰言隘西樓興不窮閉雲欹枕裏飛鳥捲簾中風
定天還水烟虛月度松回觀猶有愧破屋著盧仝

盧仝以方

處士王
逸賓

雲態看來變蒼陰坐次移一蟬吟未了雙鳥去何之薄

宦槐安夢浮名劍首炊安心元有法遣興可無詩

次韻酈著作病起

玄晏耽書昔坐癡如今手板對山持病知居士安心處
貧是詩人換骨時單見敢叅東觀論徐行休歎後山遲
山林朝市元無異怨鶴驚猿自不知

附曹縣志披雲樓在左山舊州城宋知州郭槩
建金路鐸有詩又清風閣在縣北舊州城上鐸
詩云坐深忘畏日飲久失餘霞

附續夷堅志孟州路宣叔未二十而娶未幾妻
亡追感不已鬱鬱不自聊夜夢妻如平生說身
後為護蘭童子住翡翠菴作詩記之云翡翠菴
前花草香護蘭童子淡雲妝夙緣還却三生債
不道未歸人斷腸未歸人用死者為歸人生者
為行人之義

御訂全金詩增補中州集卷二十五

欽定四庫全書

集部

御訂全金詩增補中州集卷二十六

詳校官中書臣張虎拜

主事銜臣徐以坤覆勘

總校官編修臣王燕緒

校對官編修臣勵守謙

謄錄監生臣黃嘉績

欽定四庫全書

御訂全金詩增補中州集卷二十六

師拓

一十二首

拓字無忌平涼人舉進士不第明昌中有司薦
其才以嗜酒不果作詩有氣象而工於鍊句如
賦雁云天低仍在眼山沒更傷心溪上云夕陽
明菡萏秋色靜蒹葭白曳衝烟鷺紅翻漾水霞
春日池水云水風涼綺席沙日麗金壺燕市酒

樓云氣清天曠蕩露白野蒼涼又荷蒼秋近葉
蓮膩雨餘花大為時人所稱

秋夜吟

阪路太行險波濤滄海深素縕未偶時白髮捋盈簪壯
士暮年意游子中夜心撫劍一太息月暗天橫參

浩歌行送濟夫之秦行視田園

霜斂野草白氣肅天宇清開尊酌逵客餞此秦關行秦
關杳杳愁西顧千里蒼茫但煙樹子今行轡按秋風想

見秦關雄勝處河流洶洶崑崙來蓮峯秀拔青雲開終
南南走絡巴蜀五陵北望令人哀我本渭城客浪迹來
東征窮齊歷宋嗟何營尚氣慕俠游梁城信陵白骨委
黃土夷門誰復知侯生撫劍一長嘯作歌誰為聽青天
白日空冥冥不能乘桴入滄海拂衣且欲歸汧涇落魄
高陽歸未得送子西歸空愴情

冬夜二首

雲破月穿牖夜嚴風號隙客子寢不安寒燈照空壁默

然不平事起坐長太息書但記姓名劍本匹夫敵追奔
幕前哲恢張濟時策何意造物兒重此稻梁役興酣氣
益振孤憤遠飄激非無南山雲高卧養虛寂茹芝酌懸
流嘯吟展胸臆聖達豈不念且有不煖席此抱誰與知
乾坤夜寥寂

破屋星斗入踈牖霜風生沈沈夜何久杳杳天不明燈
暗饑鼠出月朗棲鳥驚幽意苦盤礴歷落窮八紘貧賤
豈足戚所思天下英盤木無先容竟與枯朽并旃毳脛

纒掩藜藿腹不盈鬱鬱命世才何階伸一鳴僵臥蓬蒿
底要路誰為名恥作埽門謁寧為醴酒行直將叫閭闔
皎皎開寸誠白日下留照廓廓賢路亨此志恐未必搖
蕩熱中情

游同樂園

晴日明華構繁陰蕩綠波蓬丘滄海遠春色上林多流
水時雖逝遷鶯暖自歌可憐歡樂極鉦鼓散雲和

陪人遊北苑

甲子
歲

繫馬溪邊酌啼鶯柳外聞望長魂欲斷愁豁酒微醺草
色明殘照江聲入暮雲故園春色到歸思日續紛

曲江秋望

山遠嶂重出野平天四圍涼風艾實圻久雨藕花肥水
濶漁舟小天長去鳥微紫蒲行處有采采暮盈衣

和王逸賓繁臺詩

憑望憐臺迴長吟苦思荒行雲春郭暗高鳥暮天蒼草
色傷心極松風灑面涼故園兵革外殊覺路途長

贈雲中劉巨濟

雲廓乾坤迴霜摧草樹殘風聲秋晚急月色夜深寒綠
綺音誰會青霄氣自干那知燕市裏把酒得交歡

郡城南郭早望

曉立回塘上何人逸興同柳濃天霽雨萍坼岸含風鳥
影明蒼靄湖光倒碧空秦川何日到解髮濯清澧

中元後二日

暑謝涼生際庭虛雨過時天長雲斷續風急樹離披世

態貧逾薄秋光老易悲燕城寒事早還與舊貂期

和張叔獻題首善閣

宮堯飛閣與雲齊來凭脩欄日轉西秦客此時愁欲醉
隴山何處望渾迷九天花鳥催春事千里風烟入暮題
久怕殊方看節物不知今日在丹梯

附金詩紀事案同樂園有二金時汴京燕京皆
有之明一統志云同樂園在開封府城東北宋
徽宗置舊河南志亦云在開封府堦子門內此

園之在汴京者也兩志皆載有無忌詩又大金
國志云西至玉華門曰同樂園若瑤池蓬瀛柳
莊邨盡在於是此園之在燕京者也而日下舊
聞亦以此詩并趙閭閻同樂園絕句之一系於
其後未詳孰是

鄜著作權 一十六首

權字元興安陽人作詩有筆力圃田道中云斷
橋經壞屋古道入摧山石礧云蒼崖秀苔花壞

道補石棧徐行下井底斗上出天半綺岫宮云
離宮巋相望百年幾遊歷獨知窮已樂衆懟不
汝恤繁花忽灰燼歲月空瓦礫赤水道中云水
近噓寒氣星殘曳白芒燒痕云炎威隨變滅餘
燼委丘壤田疇更斷續原隰依下上班班澗溪
毛往往漏尋丈晴空墮雪影夕照壓秋嶂昆明
翻刮灰黑水走濁浪烟中一綫來細路入空曠
游石甕云雲間兩石角相鬪如闕門上連石甕

口啮訝愁猿猿柙如空洞腹瑩滑無纖痕何年
補天手月斧雲為斤琢成蒼玉甌覆此玻璃盆
龍潭云臺高野望遠地僻春意閤郊行云強引
村醪終少味漫留詩句嬾題名村行云瘦藤離
角蔓雜草樹根花夾道懸新棗荒畦臥晚瓜又
云歲豐人樂社秋近客思家書事云佳樹漲新
綠危叢棲老紅興顯叔云茶竈翻春白糟牀滴
曉紅雜詩云樹影僧攜錫鈴聲客到門片月冷

千嶂敗橋通兩村此類甚多元輿父瓊國初有
功仕至武寧軍節度使元輿以門資叙宦不達
朝廷高其才明昌初以著作郎召之未幾卒有
坡軒集行於世

聞砧

玉關消息到長安處處砧聲搗夜闌想得月殘哀響斷
一燈清淚剪刀寒

夷門遣懷

梁園花木艷精神盡屬東風點綴人
雪壓老梅香不起
問君消息幾多春

西游雜詩

茅店雞聲外柴車犬吠間
疎星涵積水殘月墮昏山
好夢人何在秋風我獨還
梨園有名酒聊此慰間關

慈恩寺塔

慈恩石刻半公卿時遇聞人為指名
龍虎榜中休著眼
一篇俚賦悟平生

木犀

菊小未堪摘，荒池悴芙蓉。窮秋不慰眼，幽獨將焉如。殷
勤蕊宮子，種桂庭之除。乘閒弄餘花，散落荒山隅。從茲
雲月喬，漂泊生江湖。娟娟耐凍枝，便與羣芳殊。琉璃剪
芳葆，蛾黃拂仙裾。唾袖花點碧，澱金粟生膚。好風一枝
拂，九里香縈紆。蘭蕙不敢友，荃蓀正僮奴。妄意此尤物，
化工異吹嘘。不然九天香，安得獨付渠。託物寄深蘊，古
今一三閭。收攬名草木，自比君子徒。惟茲不挂口，無乃

聖不居抑夫古簡編斷缺秦火餘君看齊魯臣史筆
其書惜哉不可曉臨風為嗟吁猶憐元祐前不及附歐
蘇末路益可惜例進宣和初仙根豈易致百死不一甦
昔遊汴離宮識此傾城姝摩娑三品石尚想狎客娛却
後十五年微霜半粘鬚一枝再經眼相對憐羈孤不知
苦何事玉骨乃爾癯故人憐我老尺書遠招呼要趁秋
香濃共此碧玉壺遙知嬋娟客與我一笑俱

竹林寺矮松

蒼烟靄山曲回溪抱修筠中藏古佛宮荒僻無四鄰
靈松插殿脚偃蹇今幾春何年霹靂雨抉石搜潛鱗
謫重飛舉難墮此蜿蜒身聯拳縮爪股氣屈不得伸
臥枝老無力支撐藉樵薪無風自悲吟失水固不神
安知才不才禍福了已分南山聳千嶂直幹排風雲
正以中繩墨中道遭斧斤豈知無用資千歲保其真
何必求先容養此老困輪我亦愛竒節歲晏守賤貧
他時來汝伴露頂挂葛巾

自鶴壁游善應洹山

清晨發鶴山瘦馬凌峻嶺春風吹雪谷朝霧濕雲影羊
腸抱傾崖絕壑如下井破關山却立老眼入絕境人家
跨清溪桑柘鬱數頃西行復幾里巖谷悽短景窮溪水
源清溜溜如細綆下流泉滿山勢合久方駟灘光落鏡
明嵐氣排雨冷何年鑿青壁兩佛入禪定殘僧久零落
遺塔寄烟冥荒涼布金地雜遯樵牧徑同遊成六逸轟
飲助高興流連更坐臥談笑發嘲咏感物復歎嗟醉語

忽逕庭青山不愛寶歲歲出砮礮分場沸千夫利井供
百鼎誰開爭奪源敗此丘壑勝頗思呼有力擲入萬里
迴天神定笑我癡絕漫生瘿長懷古畸人飛夢遶箕顛

八渡崖

奔湍百折似蟠虬響入山根匯復流咫尺蒼涯溪八渡
等閒藜杖我頻遊層崖障日樵聲晚寒谷呼風樹影秋
安得剩栽溪上竹一庵領盡兩山幽

留仲澤

朝初猶濕紫宸霞
暫輟旌旗擁使華
馳馬彎弓真將種
載書囊筆自名家
江湖萬里春回雁
燕趙千林月滿花
明日升沈便霄壤
更留玉樹倚蒹葭

寄唐州幕官劉無黨

白髮青山宦苦卑
邊荒誰識鳳麟姿
河西落魄高書記
劍外清貧杜拾遺
紫玉山高傳楚夢
蠙珠淵靜照黃陂
禁中頗牧他年事
先遣江南草木知

除夜

殊方節物老堪驚，病怯諸鄰爆竹聲。
梨栗異時鄉國夢，琴書此夕故人情。
眼看歷日悲存歿，淚濺屠蘇憶弟兄。
白髮明朝四十七，又隨春草一番生。

七夕

縹緲針樓外，天教彩羽過。
步雲榆送影，拂月桂交柯。
繡縷紫芳袂，瓜蓮得巧梭。
姮娥如解妬，還與試斜河。

濟源廟海子內有二黿人以將軍目之投餅餌則至

我欲燃犀起蟄雷漫誇海蘼紙錢灰將軍不是池中物
也為區區餅餌來

裴公亭

十里蓮塘際碧山入潭無數竹根泉詩狂欲灑亭間壁
却媿文公與樂天

郊行二首

十里修篁翠拂天青青漠漠水濺濺高林忽斷驚回首
不覺竒峰墮眼前

溪橋納納馬蹄輕竹裏人家犬吠聲行盡灘光溪路黑
隔林燈火夜深明

史御史肅

三十首

肅字舜元京兆人僑居北京之和衆幼孤養於
外家天資挺特高才博學作詩精緻有理尤善
用事古賦亦竒峭工於字畫業科舉為名進士
立朝為才大夫優於政事嚴而不苛所至有聲
吏畏而安之累以廉陞歷赤縣及幕官入為監

察御史遷治書出刺通州大中黨獄起為所註
誤請靜難軍節度副使大安初召為中都路轉
運副使超戶部正郎復坐鑄降同知汾州事卒
官舜元素尚理性之學屏山學佛自舜元歿之
晚年頗喜養生謂人可以不死嘗欲棄官學道
而竟止於此可哀也已詩號澹軒遺藁今在燕
都鄭庭幹家其平生則見之屏山故人外傳云
偶讀賈逵之邀飯帖有感作詩哭之

微官已歎驚棲屈異事俄傳鵬告凶彩筆書來墨痕濕
玉樓人去酒尊空當時快意牛心炙今日傷懷馬鬣封
一幅銘旌送哀挽白楊蕭索九原風

河上

堤外三竿日河邊八尺泥夜風喧馬櫪秋露冷雞棲歲
月吾生老闕山客夢迷故園桃李樹搖蕩不成蹊

別張信夫

破壘殘星沒寒城曉角孤天低雲錯莫野曠雪模糊小

市千錢米征人丈八尺邊愁故未已不敢恨長途

別懷玉

官曹不著市門仙綠髮忽忽換少年慣作簿書塵裏夢
愧無山水窟中綠蜂腰鶴膝曾搜句兔角龜毛不論禪
此別相思渺何許一川山色鴈連天

山陰縣

湧雲驅雨不成霖山徑危行未要深午夢初迴烏鳥樂
小亭斜日柳陰陰

方丈坐中

紙本功名直幾錢何如付與北牕眠
詩書作我閑中地風月知人醉裏天
水底游魚真見性樹頭語鳥小參禪
平生習氣蓮華社一炷香前結後緣

早出遵化

朝來對酒不能觴看盡西風去鳥行
山好未忘三日雅詩窮贏得一秋忙
強顏紅葉自由舞野性黃花無賴香
多謝殷勤暮雲影更留淡墨寫溪光

宿睦村

闌干河漢已西傾，獨坐披衣過五更。
簷馬丁東風外響，田車歷轆月中行。
忘形沙鳥知人意，宰地山雲不世情。
露草霜筠有幽意，詩題分付候蟲聲。

次韻安之飲酒

日上南牕已數竿，醉頭扶起不巾冠。
欲開社甕多招客，先乞兵厨暫補官。
玩世惟知酒功聖，藏身無似醉鄉寬。
麒麟閣上功名字，不博生前一笑歡。

過九里山

斷蛇扛鼎兩爭雄
陳迹荒涼萬事空
今日山前無過客
數株衰柳管秋風

道傍柳

秋霜一何嚴
凋此道傍柳
殘枝幾葉在
其勢不得久
憶昨三春時
濯洗烟雨後
弄姿舞婆娑
勸我一盃酒
別後遽能幾
忽忽成老醜
人生非金石
長短百年壽
功名與富貴
於身亦何有
古人隨物化
今已柳生肘
我獨何為

哉窮年事奔走長堤隱落月駐馬一回首春風柳梢黃
定得西歸否

登憫忠寺閣

淨宇懷超想層梯企俊游喧卑三界盡製作六丁愁聚
土閨童子移山老比丘能除分外見寸木即岑樓

讀傳燈錄

閉戶懶不出真成住夏僧肝腸雖自苦面目得人憎處
世若大夢學禪猶小乘早知文字悞更用讀傳燈

夏夜

一雨昭蘇外羣山宴寂中
移牀就佳月引袂納涼風
蝸舍憐渠小蚊雷訝許同
幽懷閱清境舒嘯夜將終

物化

物化能忘我天游不用心
蘊香羣蟻聚樹靜一蟬吟
敗井勞深汲荒庭闕近尋
枕書聊假寐夕日半牆陰

立秋日

舊穀催新穀今秋似去秋
年衰猶健飯官達也窮愁
樹

鳥依依宿簷螢細細流箇中詩句在倚杖得冥搜

感興

避俗嫌高絕干榮恥盜誇居貧偶從仕學道不忘家樹
果蕃秋實園葵粲晚花一軒吾事了無意競紛華

偶書

東風數點梅花雪吹我傷春萬里心知有高亭堪眺遠
惜無佳客共登臨晴雲入戶團傾蓋飛鳥隨人作好音
寒食清明少天色孤居未要酒盃深

放言二首

蓮社從來說陶遠竹林今不數山王家雞野鶩何須較
秋菊春蘭各自芳

清風明月無人管茶鼎薰爐與客同壯歲羞為襤襪子
而今却羨嘯嘯翁

曉出東廬

谷口子真隱水濱韋氏莊鷗鷺賓客對鴻鴈弟兄行小
圃藁生竹平林半是桑朝陽生野渡濕盡馬蹄霜

次張信夫韻

絳帳先生寄一州不教文字到橫流
草玄只擬闔門坐好事應從載酒游
虎穴已曾探虎子龍溝未信出龍頭
錦囊詩句年來滿供盡閒花野草愁

髮脫

年年道路少清歡處處葵蔬餽薄冷
月色過牕同夜夢霜華著壁獨朝寒
求醫未有詩千首破老惟消竹數竿
衰髮從今不須脫少留衰白戴黃冠

立秋日

畏景流庭過涼颺即坐來物隨時共換人覺老相催
蝶依藪穩嘶蟬抱樹哀玉簪香好在牆角幾枝開

復齋

居士年來一復齋馴庭鳥雀絕驚猜雨添牕下硯池滿
風揭牀頭書卷開身似臥輪無伎倆心如明鏡不塵埃
紛紛寵辱人間世付與浮雲任去來

北潭

竹陰松影玉葱籠十里平堤一徑通碧水乍開新鏡面
青山都是好屏風寒蟬高鳥清愁外折葦枯荷小景中
酒力未多秋興逸夕陽聊貸半林紅

晚興

秋蟲已息又還吟晚雨初晴又作陰水面微風掠蒼玉
雲頭落日緣黃金年豐酒價應須賤睡起茶甌未要深
人道雙清到心迹年來無迹亦無心

雜詩二首

春江日暖舞清漣客舍蕭蕭一縷烟幽鳥隔林招我醉
小桃當戶為誰妍禪心已作沾泥絮詩思渾如上水船
却是官閒得無事一簾紅雨枕書眠

南皮城下荒秋草說是當日燕支臺世事翻騰只如此
吾生棄置已焉哉迎風紫萸因循老背日黃花次第開
獨夜不眠思阿謝白羊如駕小車來

春雪

豐年不救兩河饑臘盡纔看小雪飛謾說春來膏澤好

其如壟上麥苗稀
空花只解驚愁眼
濕絮寧堪補敗衣
頗笑西臺瘡御史
日斜騎馬踏泥歸

御訂全金詩增補中州集卷二十六